


Director di RBC:

E reapertura lo duna un boost back na negoshinan den e area di e refineria y Aruba

ORANJESTAD(AAN): E ceramento di e refineria tabatin su impacto riba e operacionnan di RBC na San Nicolas. E trafico di cliente comercial y no comercial a baha considerablemente y peticionnan pa prestamo tambe a baha. E reduccion di cliente ta mas bisto entre clientenan di e sector comercial. Esaki Pierre Rafini, kende ta director di RBC a declara den un entrevista e siman aki. Rafini a splica cu difer-

ente contratista local y contratistanan cu a bin di exterior pa traha cu e refineria cu tabatin cuenta di banco ya no t'ey mas, nan a cera nan cuentanan. Tambe tin otronan cu no a cera nan cuenta pero a disminui nan actividadnan considerablemente; nan a purba mantene e operacionnan nan bida, naturalmente cu hopi menos trahado, el a agrega. Ta dificil duna un impresion completo pa loke ta trata clientenan di retail priva pasobra

e persona ta haci su transaccionnan bancario den e area unda cu e ta traha, Rafini a bisa, añadiendo cu ora cu Valero a cera hopi hende a busca trabao den otro sectornan, principalmente turismo, pa cual mayoria actividad ta den otro area di e isla. Turismo, banda di gobierno ta e dunado di trabao mas grandi na Aruba, pues ta logico cu hopi hende a bay den e direccion ey y p'ariba di brug.

Un persona cu ta traha na otro parti di Aruba lo haci su transaccionnan bancario den su oranan di lunch of lo sali un rato for di trabao pa haci nan mas cerca di trabao y no lo bay te San Nicolas pa esaki, Rafini a comenta.

E reapertura lo duna un boost back den e area di e refineria, pero tambe cualkier otro actividad economico nobo den e area di San Nicolas lo duna e area un boost; ki actividad cu trece fluho di trahado of bishitante lo beneficia San Nicolas den hopi forma, segun Rafini.

Actividad economico den San Nicolas ta crea empleo p'ariba di brug, cu ta resulta den transaccionnan bancario, diligencianan, compra, etc. den e area cu e hendenan ta traha. Pues no ta banco so lo nota un diferencia atrobe, pero tambe e tienda y restaurantnan chikito, etc. lo experiencia un cambio. Lo tin hende moviendo back den e area di San Nicolas, cual ta stimula e economia di e parti p'ariba di Aruba, Pierre Rafini a bisa.

E director di RBC a splica cu keto bay nan tin speranza den e area, y cu San Nicolas ta keda e di tres districto di mas grandi di Aruba. RBC lo mantene su branch na San Nicolas como cu esaki ta un area importante pa e banco, San Nicolas merece y tin tur requisito pa cualkier banco na Aruba tin un sucursal aki, sea si ta un branch chikito of grandi, Rafini a subraya.

El a splica cu e branch di RBC mas cerca di esun di San Nicolas ta mas di 15 kilome-

ter leu, tin hopi hende ta biba na San Nicolas y e districto aki ta e "otro opcion" pa bin cu desaroyo economico, e tin beachnan, waf y otro caracteristicanan cu ta hacie un bon opcion pa mas desaroyo.